

Liberât il so pais, in tal 1848, chest bon talian, contènt come une pasche, al zure — di no volé plui cialá in muse un sol todèsc. — Po, par disgràzie, i todèscs no tòrnino a Palme subite? Toni Racli, da ver galantòm, nol ûl manciá di peraule, e al si siare in ciase par no viodju. Ma intànt par vivi bisugne lavorá, e lui al lavore; dome che par cioli la misure des scarpis a la int, cumò al mande intòr la so fèmine, o al fâs vigní i aventórs in te so ciamarute.

Cussì al rive fintremai al 1866, quan' che finalmentri Palme e il Friul si unirin a l'Italie, che un pôc 'e volte, cun tante fede, tant sanc, tante volontât, 'e leve parànt fur duc' chei che i fasevin di paróns in ciase. E alore, dopo disevòt agn, Toni Racli al torne fur di ciase.

Donge di chest biel tipo di bon talian, si pò meti il marangon Pieri Mer, di Udin. Un soldât todèsc, une dì, cun t' un patàf i butà jù il ciapiel; e Pieri d' in ché volte, fin che a Udin 'e à comandât l'Austrie, nol lu à plui mitût sul ciâf ne d' istât ne d' unviar.

---